

Reipub. quod regis Persarum testimonio confirmat. Deinde Athenienses accusat, quod veteranos milites negligant, & à iunioribus per calumnias eos deferri, accusari & opprimi patiantur. In Strophis verò & Antistrophis, inuocata Musa Acharnica, hortatur Athenienses, vt bene meritis dignam reddant gratiam. Concesso Megarensibus & Bæotis foro Attico, aduenit Megareus cum duabus filiabus, quas fame adductus vendere constituit, & iocosè admodum vtranque in porcos transformat, ipsasque sacco indit. Dicæopolis vbi hunc videt, mercem licetur: porcos contrectat: iocatur, & tandem mercatur. Fortè interuenit huic contractui Sycophanta, qui se mercatorem cum suis mercibus delaturum & quadruplaturum esse comminatur. Eum repellit Dicæopolis, & receptis ad se porcis, Megareo cæpas & salem, loco precij persoluit. Accedit deinde Bæotius, cum omnis generis mercibus, ceu herbis, volucribus, feris, piscibus, easque res in foro Attico venum exponit. Ab hoc Dicæopolis opsonia ad festiuitatis suæ Choicæ celebrationem necessaria mercatur. Nicarchus Sycophanta postquam delationem esset minatus, instinctu Chori ab vtroque malè multatur, & facta commutatione mercium, ipse serui humeris imponitur pro vrceo, & in Bæotiam deportatur. Quibus peractis, famulus Lamachi Dicæopolidem adit, & heri sui nomine turdos atque alias lautitias ab eo petit: sed nihil impetrat. Ex qua re Chorus spem pacis concipit, & bellum, in quod antea toto animo consistebat, iam execratur. At Dicæopolis inceptas Choas peragit, & collaudata pace, eam sibi vxorem iungit, plurimis enumeratis illius commodis. Accedit deinde Caduceator, qui reliquæ plebi Choas indicit, eamque ad bibendum epulandumque hoc pacis tempore exhortatur. Paulò post gemens ac plorans accurrit agricola, cui boues ademerant Bæotij. Petit à Dicæopolide, vt sublato bello, pacem cum Thebanis faciat. Sed quia sibi soli fœdus comparauerat Dicæopolis, nihil obtinet agricola. Aduolat item Paranympus cum pronuba, & sponsi sponsæque nomine Dicæopolidem orat, vt pacem cum hostibus faciat, ne nouus maritus in militiam euocatus, à coniugis amplexu auellatur. Tum duo prodeunt nuncij, quorum alter Lamacho, homini turbarum & belli studioso, repentinam hostium irruptionem annunciat, & in armis esse iubet: alter Dicæopolidem pacis cupidum, ad cœnam sacerdotis Bacchi inuitat. Hac occasione arrepta, Dicæopolis Lamachum irridet, armaturam eius exhibilat, & militari duritiei, bellique calamitatibus, commoda, & voluptates pacis, lepidè opponit. Quibus digressis, altero quidem in bellum, altero verò ad cœnam, Chorus Antimachum quendam exagitat, & omnibus diris deuouet, ipsumque obiter Cratinum vellicat. Nulla ibi mora interposita adest nuncius è castris, qui Lamachi heri sui cladem ac vulnera exponit, omnesque seruos ad curationem vulnerum iubet accurrere. Eum è vestigio insequitur Lamachus, & miserabili clamore cladem acceptam deplorat, bellumque execratur. Dicæopolis, vbi miserum videt, falsè irridet, & multis sarcasmis turbulento homini insultat. At ipse Chorus applaudente, vtrem præmij loco, quod fortiter in festo Bacchi bibisset, ab Acharnensibus accipit.

A R G V M E N T V M

Α Κ Ρ Ο Σ Τ Ι Χ Ε Σ .

- A more Pacis, quidam Acharnensis sibi
 C omparat ab hoste fœdus, Amphitheo duce:
 H oc vbi seniorum plebs videt popularium:
 A mphitheum & ipsum persequuntur lapidibus.
 R euersus ergo in concionem, deuouet
 N eci caput, factum nisi probet suum.
 E xin Periclem & Megaricam legem refert,
 N egatque causam aliam esse presentis mali.
 S ed vt is retentam pacem agat letus domi:
 E xcedit vrbe praeliatum Lamachus.
 I nterea ab hoste vulnus rettulit graue:
 S enex reuersum ridet inter pocula.